



Broj: **03/1-50-14-7-35-12/17**
Sarajevo, 8. 5. 2017.

PREDMET: Informacija s 94. Rose-Roth seminara PSNATO-a i zasjedanja posebne grupe PSNATO-a za zemlje MENA, Sarajevo, 21.-23. 3. 2017.

Od 21. do 23.3.2017. u Velikoj sali Parlamentarne skupštine BiH u Sarajevu održan je 94. Rose - Roth seminar PSNATO-a i zasjedanje Posebne grupe PSNATO-a za zemlje MENA na kojima su učestvovali: Sifet Podžić, predsjedavajući, Borislav Bojić, zamjenik predsjedavajućeg, i Bariša Čolak, član Zajedničke komisije za odbranu i sigurnost BiH.

Seminar je organizirala PSNATO-a u saradnji s PSBiH.

Učesnicima seminara su se u skladu s programom obratili: Šefik Džaferović, predsjedavajući Predstavničkog doma PSBiH, Bariša Čolak, predsjedavajući Doma naroda PSBiH, te Sifet Podžić, predsjedavajući Zajedničke komisije za odbranu i sigurnost BiH.

U radu seminara u ime Delegacije PSBiH u PSNATO-a učestvovali su: Nikola Lovrinović, predsjedavajući, i Asim Sarajlić, član Delegacije PSBiH u PSNATO-a, te Safet Softić, zamjenik predsjedavajućeg Doma naroda PSBiH.

Učesnicima seminara obratili su se i: Mladen Ivanić, predsjedavajući Predsjedništva BiH, Denis Zvizdić, predsjedavajući Vijeća ministara BiH, Marina Pendeš, ministrica odbrane BiH, Dragan Mektić, ministar sigurnosti BiH, Josip Brkić, zamjenik ministra vanjskih poslova BiH, kao i Nedeljko Čubrilović, predsjednik Narodne skupštine Republike Srpske.

U radu seminara učestvovali su predstavnici 42 zemlje, od toga 19 članica PSNATO-a, 11 pridruženih članica PSNATO-a kao i 12 članica zemalja posebne grupe za zemlje MENA.

Prvog dana 94. Rose – Roth seminara Parlamentarne skupštine Sjevernoatlantskog saveza (PSNATO) i zasjedanja Posebne grupe za Bliski istok i Mediteran PSNATO-a, koji je počeo 21.3.2017., 150 učesnika iz 42 zemlje svijeta diskutirali su o političkim stavovima u vezi s punopravnim članstvom zemalja regiona Zapadnog Balkana u NATO-u, kao i o promoviranju razumijevanja Alijanse, te uklanjanju predrasuda u vezi s njenim djelovanjem.

Tokom rasprave o ovim temama, predsjedavajući Zajedničke komisije za odbranu i sigurnost BiH Sifet Podžić rekao je da u Bosni i Hercegovini postoje različita viđenja o pitanju njene integracije u NATO, ali i naglasio da svi politički akteri aktivno rade na pronalaženju zajedničkih rješenja. S tim u vezi, Podžić je dodao da je Zajednička komisija za odbranu i

sigurnost BiH učinila mnogo na rješavanju problema i stvaranju pretpostavki koje našu državu vode u okvir zemalja članica NATO-a. Konstatirajući da je proces knjiženja vojne imovine počeo, Podžić je izrazio uvjerenje da će aktiviranjem Akcionog plana za članstvo (MAP) biti poslana snažna podrška dosadašnjim naporima Bosne i Hercegovine na njenom putu ka članstvu u NATO-u. Podsjetivši na to da su domovi PSBiH 2008. godine usvojili Rezoluciju o spremnosti Bosne i Hercegovine za integracije u NATO, Podžić je istaknuo da od predstavnika PSNATO-a očekuje podršku u ispunjavanju obaveza koje našu zemlju vode ka evropskim i euroatlantskim integracijama.

Učesnike seminara Podžić je upoznao i s doprinosom koji je Zajednička komisija za odbranu i sigurnost dala u procesu uništavanja viška municije i minsko-eksplozivnih sredstava (MiMES), rješavanju problema u javnim nabavkama, pomaganju civilnom stanovništvu tokom elementarnih nepogoda i kriznih situacija, te vojnog deminiranja.

Predsjedavajući Predsjedništva BiH Mladen Ivanić upoznao je učesnike seminara s trenutnim političkim ambijentom u našoj zemlji u vezi s njenim napretkom u saradnji s NATO-om, te s političkim pogledom na aktiviranje MAP-a. Govoreći o integraciji BiH u NATO, Ivanić je naveo da ne postoji dilema o pitanju stupanja Bosne i Hercegovine u MAP, te izrazio očekivanje da će aktivacija MAP-a dovesti do stabilizacije sigurnosnih prilika u BiH i cijelom regionu Zapadnog Balkana. Zaključio je da je naša zemlja opredijeljena za nastavak saradnje s NATO-om, naročito na polju učešća jedinica OSBiH u okviru programa podrške miru u Afganistanu i drugim zemljama svijeta, kao i na polju borbe protiv ISIL-a.

Ministrica odbrane BiH Marina Pendeš navela je da pristupanje Bosne i Hercegovine EU i NATO-u predstavljaju dva strateška cilja vanjske politike naše zemlje. Podsjetila je na to da Bosna i Hercegovina intenzivno radi na procesu knjiženja perspektivne vojne imovine, te istaknula pozitivne trendove u vezi sa usvajanjem dokumenta „Pregled odbrane“ u Predsjedništvu BiH.

Ministrica Pendeš izrazila je očekivanje da će ovaj seminar pomoći predstavnicima PSNATO-a da putem interaktivnog dijaloga steknu cjelovitiju sliku o nastojanjima zemalja Zapadnog Balkana na njihovom putu euroatlantskih integracija, a posebno o vrijednosti aktiviranja MAP-a za Bosnu i Hercegovinu, koje bi, kako je rekla, bilo veoma značajno i za samu Alijansu.

Učesnicima 94. Rose - Roth seminara PSNATO-a i zasjedanja Posebne grupe za Bliski istok i Mediteran PSNATO-a obratila se i komandantica Štaba NATO-a u Bosni i Hercegovini brigadna generalica Giselle Willz, a svoje stavove prezentirali su i predstavnici Centra za međunarodne odnose iz Banje Luke, Beogradskog centra za sigurnosne studije, te Atlantskog savjeta Crne Gore.

Drugog dana 94. Rose – Roth seminara Parlamentarne skupštine Sjevernoatlantskog saveza i zasjedanja Posebne grupe za Bliski istok i Mediteran PSNATO-a učesnici iz 42 zemlje svijeta u okviru odvojenih sesija diskutirali su o viđenjima u vezi sa članstvom zemalja regiona Zapadnog Balkana u NATO - savezu, iz perspektive struke, kao i iz perspektive Bosne i Hercegovine, te o glavnim političkim pitanjima na Zapadnom Balkanu.

Iznoseći svoje stavove o trenutnoj političkoj situaciji u našoj zemlji, predsjedavajući Doma naroda PSBiH Bariša Čolak istakao je da se Bosna i Hercegovina nalazi pred historijskim izazovom snažnijeg iskoraka prema euroatlantskom integracijama. Naglasio je da to podrazumijeva više demokratije, bolju zaštitu ljudskih prava, izgradnju političke stabilnosti i pravne sigurnosti ili, pak, nastavak stagnacije i autistične politike sukoba i razmirica s unaprijed nesagledivim poljedicama, ne samo za našu državu nego i mnogo šire. Čolak je naveo da sve zemlje regije, bez obzira na stepen njihove integracije prema EU, moraju ukazivati na nužnost integracije Jugoistočne Evrope u EU i NATO. Ukazujući na negativne trendove s kojima se Bosna i Hercegovina susreće, Čolak je naglasio da veliki broj građana i dalje napušta našu zemlju, među kojima dominira mlada generacija naših državljana. Na kraju, ocijenio je da bi, ako tokom ove godine u PSBiH uskoro ne dođe do političkog dogovora o pitanju izmjena Izbornog zakona BiH, naredna izborna 2018. godina mogla biti vrlo turbulentna i problematična. Čolak je zaključio da zvaničnici u našoj zemlji moraju spustiti tenzije i preuzeti odgovornost za izgradnju Bosne i Hercegovine prema mjeri svih naroda i građana koji u njoj žive.

Član Delegacije PSBiH u PSNATO-a Asim Sarajlić podsjetio je prisutne učesnike 94. Rose-Roth seminara da trenutnu političku situaciju u Bosni i Hercegovini opterećuju brojni problemi. Izrazio je uvjerenje da postoji izlaz u vezi s ovim pitanjem, te da se ukupna situacija u našoj zemlji može popraviti. Sarajlić je zaključio da je dijalog ključna riječ u ovom procesu, te da svi zajedno u Bosni i Hercegovini moramo učiniti više u definiranju naše bolje i svjetlije budućnosti.

Govoreći o perspektivama Bosne i Hercegovine u vezi s njenim članstvom u NATO-u, predsjedavajući Vijeća ministara BiH Denis Zvizdić naglasio je da su mir i stabilnost osnovni i najvažniji prioritet svih građana naše zemlje, te da NATO predstavlja sinonim za stabilnost i prosperitet svih njenih članica. Zvizdić je izrazio očekivanje za značajnijim ubrzanjem procesa EU integracija, a posebno za aktiviranjem Akcionog plana za članstvo (MAP) u NATO-u, što ujedno predstavlja i strateški cilj naše zemlje. Podsjetio je na to da je prošla godina bila najuspješnija godina za našu zemlju kada je u pitanju njen put ka EU, o čemu najbolje svjedoče posljednja dva godišnja izvještaja Evropske komisije o napretku Bosne i Hercegovine. Zvizdić je pozdravio NATO-vu politiku otvorenih vrata, ocijenivši da je ona veoma značajna za cijeli region Zapadnog Balkana. Zaključio je da smatra da naša zemlja treba postati članicom Alijanse, te prisutne učesnike Rose-Roth seminara pozvao da aktiviraju MAP, jer o ovom pitanju postoji koncenzus u Bosni i Hercegovini.

Učesnicima seminara obratili su se i: predsjednik Narodne skupštine Republike Srpske Nedeljko Čubrilović, predsjedavajući Komiteta za civilnu dimenziju sigurnosti PSNATO-a Vitalino Canas, a svoja viđenja iz perspektive struke po pitanju reformske agende BiH dao je i zamjenik šefa Delegacije EU u BiH.

Tokom posljednje sesije apostrofirana su glavna politička pitanja na Zapadnom Balkanu, poput odnosa Beograda i Prištine, aktuelne situacije u Makedoniji, te uključenosti trećih sila u politička dešavanja u zemljima regije.

U okviru sesije na kojoj je razgovarano o nestabilnosti u regionima Bliskog istoka, Sjeverne Afrike i Zapadnog Balkana, učesnicima se obratio predsjednik PSNATO-a Paolo Alli, koji se zahvalio PSBiH na izvrsnoj suorganizaciji ovog seminara i prijemu koji su predstavnici PSNATO-a iz 42 zemlje svijeta imali u Sarajevu. Alli je naveo da se tokom razgovora s rukovodstvom oba doma PSBiH uvjerio u čvrstu volju predstavnika institucija vlasti Bosne i Hercegovine da u narednom periodu aktivno rade na reformama i ispunjavanju uslova za nastavak euroatlantskih integracija naše zemlje. Ocijenio je da su parlamentarni dijalog i diplomatija pitanja od krucijalne važnosti, te istaknuo da razgovori, koji su tokom prethodna tri dana vođeni u Sarajevu, predstavljaju garant stabilnosti u zemljama regiona. Zaključio je da na političkim liderima stoji velika odgovornost u vezi s ovim pitanjima, jer građani upravo od njih očekuju rješenja koja će omogućiti bolju ekonomiju i bolje uslove za život svih u regionu Zapadnog Balkana.

Tokom posljednjeg dana zasjedanja učesnicima Rose - Roth seminara PSNATO-a prezentiran je izvještaj Posebne grupe za Mediteran i Bliski Istok, a razgovarano je i o terorističkim izazovima s kojima se susreću zemlje Evrope i region Zapadnog Balkana. U raspravi o implikacijama koje se odnose na pitanja terorizma i ekstremizma u zemljama regiona, učesnicima seminara i zasjedanja Posebne grupe za Bliski Istok i Mediteran PSNATO-a obratio se i ministar sigurnosti BiH Dragan Mektić.

Radni dio 94. Rose - Roth seminara PSNATO-a i zasjedanja Posebne grupe za Bliski Istok i Mediteran PSNATO-a okončan je prezentacijom inicijative za sprečavanje nasilnog ekstremizma u Jugoistočnoj Evropi, a učesnici su upoznati i s trenutnom situacijom i statusom boraca iz Evrope na ratištima u Siriji i Iraku i povratnika iz ratom zahvaćenih zona.

Završnim obraćanjem predsjedavajućeg Delegacije PSBiH u PSNATO-a Nikole Lovrinovića, 23.3.2017. je u Sarajevu okončan 94. Rose - Roth seminar PSNATO-a i zasjedanje Posebne grupe za Bliski Istok i Mediteran PSNATO-a.

Predsjedavajući Lovrinović izrazio je zadovoljstvo činjenicom da je PSBiH tri dana bila domaćin eminentnog skupa, u čijem je radu učestvovalo više od 150 parlamentaraca iz 19 zemalja NATO-a, 11 zemalja pridruženih članica Alijanse, među kojima je i Bosna i Hercegovina, te 12 država regiona Bliskog Istoka i Sjeverne Afrike. Predstavnicima PSNATO-a Lovrinović se zahvalio na saradnji tokom organizacije ovog seminara, te izrazio očekivanje da će diskusije koje su vođene prethodnih dana doprinijeti stabilizaciji političkih i sigurnosnih prilika u zemljama regiona.

Predsjedavajući Zajedničke komisije
Sifet Podžić

Dostavljeno:

- naslovu
- a/a